



Na osnovu člana 13. stav (2) i člana 15. stav (1) i (2) Zakona o finansiranju političkih stranaka („Službeni glasnik BiH“, broj: 22/00), a u vezi sa članom 15.6. stav (2) Izbornog zakona Bosne i Hercegovine („Službeni glasnik BiH“, broj 23/01, 7/02, 9/02, 29/02, 4/04, 20/04 i 25/05, 52/05, 65/05, 77/05, 11/06 i 24/06), Centralna izborna komisija Bosne i Hercegovine je na 31. sjednici, održanoj dana 24.05.2007. godine donijela

O D L U K U

(1) Politička stranka, **Socijaldemokratska partija Bosne i Hercegovine**, sa sjedištem u Sarajevu, ulica Alipašina 41, **odgovorna je** što je u 2004. godini primila priloge od pravnih lica iznad zakonom dozvoljenog limita u ukupnom iznosu od **552.953,44 KM** čime je prekršila odredbu člana 5. stav (1) Zakona o finansiranju političkih stranaka, pa joj se na osnovu navedene zakonske odredbe i primjenom člana 15. stav (2) Zakona o finansiranju političkih stranaka izriče novčana kazna u iznosu od **555.000,00 KM (slovima: petstopedesetpet hiljada konvertibilnih maraka)**.

(2) Uplata novčane kazne iz stava (1) ove odluke vrši se na račun Ministarstva finansija i trezora BiH, broj: 000 003 00000001 45, kod Centralne banke BiH, sa pozivom na broj 37111 i sa naznakom-kazna po odluci Centralne izborne komisije BiH broj: 01-07-6-1729/07 od 24.05.2007. godine, u roku od osam (8) dana od dana pravosnažnosti odluke, a dokaz o izvršenoj uplati dostaviti Centralnoj izbornoj komisiji BiH.

O b r a z l o ž e n j e

Odredbama člana 11. Zakona o finansiranju političkih stranaka propisana je obaveza političke stranke da Centralnoj izbornoj komisiji BiH podnese finansijski izvještaj za svaku kalendarsku godinu na obrascima propisanim od Centralne izborne komisije BiH do 31.03. naredne kalendarske godine i poseban finansijski izvještaj za period izborne propagande na način utvrđen Izbornim zakonom BiH. Socijaldemokratska partija Bosne i Hercegovine je navedene finansijske izvještaje dostavila Centralnoj izbornoj komisiji BiH na propisanim obrascima, nakon isteka zakonom propisanog roka i to dana 15.04.2005. godine.

Služba za reviziju finansijskog poslovanja političkih stranaka u Centralnoj izbornoj komisiji BiH (u daljem tekstu: Služba za reviziju) je obavila reviziju godišnjeg finansijskog izvještaja za 2004. godinu i postizbornog finansijskog izvještaja, nakon provedenih općinskih izbora 2004. godine, u organizacionim dijelovima političke stranke Socijaldemokratske partije Bosne i Hercegovine i to: Glavnom odboru, Regionalnom odboru Banjaluka i općinskim odborima Bihać, Gradačac, Visoko, Stari Grad Sarajevo i Cazin, u skladu sa članom 14. stav (2) Zakona o finansiranju političkih stranaka.

Služba za reviziju je sačinila Preliminarni izvještaj o reviziji godišnjeg finansijskog izvještaja za 2004. godinu i postizbornog finansijskog izvještaja, nakon provedenih općinskih izbora 2004. godine, u kojem je navela utvrđene nepravilnosti i dostavila Centralnoj izbornoj komisiji BiH na usvajanje.

Preliminarni izvještaj, koji je usvojila Centralna izborna komisija BiH na 192. sjednici od 28.12.2005. godine, dostavljen je aktom broj: 09-07-6-1882/05 od 28.12.2005. godine na očitovanje Socijaldemokratskoj partiji Bosne i Hercegovine u roku do 20.01.2006. godine, kako bi bila u prilici da ospori eventualno netačne nalaze, kao i da u skladu sa članom 13. stav (3) Zakona o finansiranju političkih stranaka dobrovoljno otkloni utvrđene nepravilnosti.

Ova politička stranka se u ostavljenom roku očitovala aktom broj: 01-04-68/06 od 19.01.2006. godine u kojem nije osporavala nalaze, odnosno činjenice iz navedenog Preliminarnog izvještaja, ali je osporavala pravne kvalifikacije iznesene u izvještaju. Takođe, izrazila je spremnost da dobrovoljno otkloni određene nedostatke, a neke je i otklonila. Služba za reviziju je sačinila Izvještaj o reviziji godišnjeg finansijskog izvještaja za 2004. godinu i postizbornog finansijskog izvještaja, koji je dostavila Centralnoj izbornoj komisiji BiH na usvajanje, ne uvažavajući primjedbe stranke u dijelu koji se odnosi na navod da se sredstva koja je stranka primila iz inozemstva ne smatraju prilozi pravnih lica, na osnovu pravnog stava Centralne izborne komisije BiH od 21.02.2006. godine, kojim je zauzeto stanovište da zakon ne pravi razliku između domaćih i stranih pravnih lica u pogledu limita priloga političkim strankama, odnosno da strana pravna lica nisu izuzeta od limita.

Ovaj stav Centralne izborne komisije BiH je naknadno, a prije donošenja ove odluke, potvrđen i Izvještajem Ustavno-pravne komisije Predstavničkog doma Parlamentarne skupštine Bosne i Hercegovine broj: 01/1-50-1-4/07 od 14.03.2007. godine o jasnoći norme člana 3. stav (1) tačka b) Zakona o finansiranju političkih stranaka.

Centralna izborna komisija BiH je na 206. sjednici od 20.03.2006. godine usvojila navedeni Izvještaj, a koji je, u skladu sa odredbom člana 14. stav (4) Zakona o finansiranju političkih stranaka, objavljen u Službenom glasniku BiH broj: 78/06 od 28.09.2006. godine, a na osnovu člana 12. stav (4) ovog Zakona na web stranici www.izbori.ba Centralne izborne komisije BiH.

Agencija za statistiku BiH je, na zahtjev Centralne izborne komisije BiH broj: 09-07-6-1827/05 od 12.07.2005. godine, aktom broj: 01-43-1518/05 od 19.07.2005. godine dostavila podatak da visina prosječne neto plaće u BiH u 2004. godini iznosi 505,00 KM, što znači da osam (8) prosječnih neto plaća u BiH iznosi 4.040,00 KM, odnosno da upravo toliko iznosi i limit na priloge pravnih lica političkoj stranci u jednoj godini.

Služba za reviziju je utvrdila, i navedenim izvještajem dokumentovala, da je Socijaldemokratska partija Bosne i Hercegovine u kontrolisanom periodu primila priloge od.

- Laburističke partije Velike Britanije u iznosu od 451.831,90 KM, **što je za 447.791,90 KM više od dozvoljenog iznosa,**
- SFU – Frit forum- Kraljevina Danska u iznosu od 37.132,06 KM, **što je za 33.092,06 KM više od dozvoljenog iznosa,**
- Socijaldemokrati- Stocholm city u iznosu od 70.409,45 KM, **što je za 66.369,45 KM više od dozvoljenog iznosa i**
- DSU - Danski socijaldemokrati-Danska u iznosu od 9.740,03 KM, **što je za 5.700,03 KM više od dozvoljenog iznosa**

što ukupno iznosi 552.953,44 KM priloga preko limita.

Na zahtjev revizora, stranka je sačinila rekapitulaciju inodonacija i pismeno ih dostavila službi za reviziju, i podaci iz tog akta upravo se u potpunosti slažu sa napred navedenim.

Dakle, na osnovu činjeničnog stanja utvrđenog u postupku revizije i na osnovu ocjene naprijed navedenih činjenica, Centralna izborna komisija BiH je nesporno utvrdila da je Socijaldemokratska partija Bosne i Hercegovine **primanjem priloga od pravnih lica preko limita u ukupnom iznosu od 552.953,44 KM, postupila suprotno odredbi člana 5. stav (1) Zakona o finansiranju političkih stranaka, a kako nije prihvatila pravnu kvalifikaciju da su ovi prilozi limitirani, to nije ni pokušala da dobrovoljno otkloni nepravilnost.**

Nastojanja ove stranke da u postupku revizije dokaže da ova sredstva ne potpadaju pod priloge koji su limitirani, zbog toga što su iz inostranstva, odnosno što se «troše za projekte», Centralna izborna komisija BiH nije mogla prihvatiti, jer Zakon ne pravi razliku između domaćih i stranih pravnih lica, niti ih definiše, a način utroška **zakonito pribavljenih** sredstava političke stranke nije predmet revizije. Prema Zakonu o finansiranju političkih stranaka, Služba za reviziju kontroliše isključivo zakonitost izvora finansiranja, odnosno prihoda, prihode političkih stranaka (izvore finansiranja), a ne način trošenja.

Centralna izborna komisija BiH izrekla je novčanu kaznu u iznosu od 555.000,00 KM (petstopedesetpet hiljada konvertibilnih maraka) Socijaldemokratskoj partiji Bosne i Hercegovine u skladu sa odredbom člana 15. stav (2) Zakona o finansiranju političkih stranaka uz obavezu da se uplata iznosa izvrši u roku od osam (8) dana od dana pravosnažnosti odluke na žiro račun kao u dispozitivu, te dokaz o izvršenoj uplati dostavi Centralnoj izbornoj komisiji BiH.

Odlučujući o visini novčane kazne, koja je za ove prekršaje predviđena članom 15. stav (2) Zakona o finansiranju političkih stranaka, a koja može iznositi do visine trostrukog iznosa ostvarenih na nezakonit način, Centralna izborna komisija BiH je imala u vidu težinu prekršaja i visinu zapriječene kazne, kao i sve olakšavajuće i otežavajuće okolnosti i to:

- da je navedena stranka ranije kažnjavana primjenom odredaba ovog Zakona sa 1.000,00 KM Odlukom Centralne izborne komisije BiH broj: 01-07-6-1556/05 od 13.06.2005. godine, zbog kršenja odredbi člana 20. Zakona o finansiranju političkih stranaka i
- da je njen finansijski izvještaj za 2004. godinu urađen u skladu sa propisima.

Stav je Centralne izborne komisije BiH da kazna koja bi bila jednaka ili manja od visine sredstava koja su ostvarena na nezakonit način, ne bi bila kazna, jer bi bila stimulatívna za kršenje ovog zakona i ostvarivanje zabranjenih sredstava u razlici između visine kazne i visine tako ostvarenih sredstava.

Centralna izborna komisija BiH smatra da je izrečena sankcija adekvatna učinjenim prekršajima, gore navedenim olakšavajućim i otežavajućim okolnostima i da će se ovakom sankcijom, koja je neznatno veća od sume pribavljene na nezakonit način, postići svrha kažnjavanja.

Stav (2) ove odluke baziran je na odredbi člana 3. stav (1) Zakona o trezoru institucija Bosne i Hercegovine.

Na osnovu gore navedenog Centralna izborna komisija BiH je i odlučila kao u dispozitivu ove Odluke.


Pravna pouka: Na osnovu člana 21. stav (2) Zakona o finansiranju političkih stranaka, a u vezi sa članom 6.9 stav (1) i (2) Izbornog zakona BiH, protiv ove Odluke može se podnijeti **žalba** Apelacionom odjelu Suda Bosne i Hercegovine **u roku od dva dana** od dana prijema ove Odluke.

Žalba se podnosi putem Centralne izborne komisije BiH.

Broj: 01-07-6-1729/07
Sarajevo, 24.05.2007. godine

Dostavljeno:

- Socijaldemokratska partija BiH
- a/a



Predsjednik

Jepan Mikić